

Ihuriro rikomeje kubaka ubushobozi bw'abayobozi b'urugaga rushamikiye ku Mutwe wa Politiki

Ku matariki ya 18 – 19 Werurwe 2023, mu cyumba cy'inama cya Hotel Bethany mu Karere ka Karongi, mu Ntara y'Iburengerazuba, habereye amahugurwa y'abayobozi b'urugaga rw'abagore rushamikiye ku Mutwe wa Politiki. Aya mahugurwa yitabiriwe n'abagore 77, bo mu Mitwe ya Politiki 11 iri mu Ihuriro, baturuka mu Turere twose tugize Intara y'Iburengerazuba.



Aya mahugurwa yatangiye n'Umuvugizi w'Ihuriro ry'Igihugu Nyunguranabitekerezo ry'Imitwe ya Politiki, Depite UWANYIRIGIRA Gloriose. Mu ijamba rye, yashimiye abayitabiriye, asobanura ko agamije kubaka ubushobozi bw'abagore bari mu nzego z'ubuyobozi bw'Umutegeko wa Politiki kugira ngo bitabire kujya mu myanya ifatirwamo ibyemezo mu Mitwe ya Politiki babarizwamo. Yibukije ko kubaka ubushobozi bw'abayobozi n'abayoboze b'Imitwe ya Politiki ari imwe mu nshingano z'Ihuriro. Ihuriro rikaba rifatanyaga n'Umuryango UNDP mu gutegura aya mahugurwa.

Umuvugizi w'Ihuriro yagaragaje bimwe mu bibazo bikibangamira abagore, harimo ikibazo cy'abagabo bamwe bafite imyumvire itari yo ku ihame ry'uburinganire n'ubwuzuzanye; hari kandi n'abagabo bamwe bashakaga kwiharira imitungo y'urugo yinjiza amafaranga, n'igihe umugore yaba afite akazi umugabo akamutegeka kuzajya azana amafaranga yose akorera akaba ari we ugena uko azakoreshwa, kandi igice kinini akagikoresha mu bitari iby'urugo (nko kuyanywera).

Yagaragaje kandi n'ikibazo cy'abangavu baterwa inda, hakaba n'imiryango imwe n'imwe irangwa n'amakimbarane ya buri gihe.

Yavuze ko ari ngombwa gukomeza gusobanurira Abanyarwanda b'ingeri zose ibirebana n'ihame ry'uburinganire Igihugu cyacu kiyemeje kugenderaho kandi n'Imitwe ya Politiki yacu ikaba irishyigikiye.

Yasoje avuga ko abagore bari mu nzego z'ubuyobozi zinyuranye zifatirwamo ibyemezo bagaragaje ko bashoboye ndetse bamwe muri bo bayoboye neza inzego nkuru z'igihugu ndetse n'Imiryango mpuzamahanga. Umubare wabo kandi ugenda wiyongera, bikaba bikwiye kubera abandi bagore urugero rwiza bikabaremamo icyizere, bagatinyuka kujya mu myanya ifatirwamo ibyemezo.

Muri aya mahugurwa, intumwa y'Umuryango UNDP, utera inkunga aya mahugurwa Bwana, MACUMU Emmanuel, yavuze ko UNDP ikorana n'Ihuriro ry'Imitwe ya Politiki mu rwego rwo gukomeza kubaka ubushobozi bw'abagore bari mu Mitwe ya Politiki, bityo bikabafasha kwigirira icyizere no guharanira kujya mu myanya ifatirwamo ibyemezo. Yabashishikariye gukurikira neza ibiganiro bahabwa kandi ubumenyi bungutse bakazabusangiza abandi no kubushyira mu bikorwa.



Impuguke **Kimonyo Augustin**, yatanze ikiganiro k'uruhare rw'abagore mu bikorwa bya politiki. Mu kiganiro cye, yagarutse ku mateka y'ihame ry'uburinganire n'icyatumye iryo hame rijyaho. Yavuze ko nyuma y'intambara ya kabiri y'isi hari ubusumbane bukabije hagati y'abagabo n'abagore, akaba ariyo mpamvu mu 1945 hasinywe amasezerano avuga ko abantu bose bagomba kureshya imbere y'amategeko. Naho mu mwaka w' 1995, I Beijing mu Bushinwa hasinywe amasezerano yemeza ko ibihugu bigomba guteza imbere ihame ry'uburinganire.

U Rwanda rukaba rwarashyize ihame ry'uburinganire mu Itegeko Nshinga ryaryo ryo mu 2003 ryavuguruwe mu 2015, ahemejwe ko mu Nzego zifatirwamo ibyemezo hagomba kubamo nibura 30% b'abagore. Yagaragaje zimwe mu nzitizi zibangamira umugore kujya mu myanya ifatirwamo ibyemezo, zirimo gukoreshwa imirimo itinjiza amafaranga, ihohoterwa rishingiye ku gitsina, ubumenyi bucye, ubukene, abagabo baca intege abagore bakababuza kujya mu nzego zifata ibyemezo n'ibindi.

Mu gusoza, yagarutse ku cyakorwa kugira ngo ibyo bihinduke, harimo gukomeza guhugura abantu benshi, cyane cyane abagabo kugira ngo barusheho gusobanukirwa ihame ry'uburinganire, kongerera ubumenyi igitsina gore, gufasha abagore kwikura mu bukene, n'ibindi.

Me KAMASHAZI Donnah, yatanze ikiganiro ku buriganire n'ubwuzuzanye (Gender Equality & Equity). Yasobanuye ko 'gender' ari nk'ikanzu y'imyifatire n'imigirire sosiyete yambika umwana uvutse hashingiye ku gitsina cye (umukobwa cyangwa umuhungu). Ibyo bigashingirwaho hagenwe imirimo n'imico y'abahungu cyangwa iy'abakobwa, akaba ari nabyo bitera ubusumbane



muri sosiyete. Yakomeje avuga ko ‘gender’ ari ikintu gihinduka kuko ishingiye ku myumvire bitewe n’ibyo sosiyete ishaka muri icyo gihe. Yasobanuye ko ‘gender equality’ ari uburenganzira bw’umugabo n’umugore bugomba kungana mu mategeko no mu mirimo (Urugero nk’itegeko ryo kuzungura abagore batagiragaho uburenganzira). Naho ‘gender equity’ yavuze ko ari uburyo bwo kuziba icyuho cyatewe n’ubusumbane bwabayeho igihe kirekire, urugero nk’itegeko ryemerera nibura 30% by’abagore mu myanya y’inzego zifatirwamo ibyemezo.

Yasoje ikiganiro cye ashishikariza abantu bose gushyira imbere ihame ry’uburinganire mu nzego bakoramo no guhugura abandi bayoboze mu Mitwe ya Politiki babarizwamo.



Muri aya mahugurwa kandi, Depite Mukabikino Jeanne Henriette, yatanze ubuhamya bw’urugendo rwe muri politiki. Yavuze ko inzozo ze zari ukuba umunyamabanga w’umuyobozi (secrétaire) kuko abandi bagore yafatiragaho urugero ariwo murimo bakoraga mu kazi ka Leta.

Nyuma ya Jenocide yakorewe Abatutsi, yashoboye kwiga neza, agira imyumvire iteye imbere, yumva agomba no kujya mu myanya ifatirwamo ibyemezo.

Byatumye ajya kwiga ‘Sciences administratives’, ayirangije yakoze amahugurwa kuri ‘peacebuilding’ yari yateguwe n’Ihuriro bituma ajya kubyiga mu cyiciro cya gatatu cya kaminuza. Yavuze ko gukunda politiki byatangiriye muri kaminuza aho yafataga n’umwanya akajya gusura Inteko Ishinga Amategeko kureba uko Inteko iterana. Ibyo byamuteye ishyamba ryinshi akomeza kubikurikirana no kubyiga kugeza ahisemo umutwe wa politiki abarizwamo. Ageze muri uwo Mutwe wa Politiki yatangiye kujya yiyamamariza kujya mu myanya itandukanye, aza gutorerwa kuyobora Akarere ka Rubavu. Nyuma muri 2008 yaje kwiyamamariza kujya mu Nteko Ishinga Amategeko aratsindwa, yongera kwiyamamaza muri 2010 nabwo aratsindwa, yongera muri 2013 noneho aratsinda. Yababwiye ko gutsindwa bitigeze bimuca intege ahubwo byamwongereraga imbaraga bigatuma arushaho kwigirira icyizere. Yasoje ashishikariza abagore gukomera ku ntego bihaye ntibite ku bibaca intege kuko bizahoraho mu byo bakora byose. Yabashishikariye gufatirana amahirwe Leta ikomeza guha umugore bakayabyaza umusaruro. Yabibukije kutibagirwa inshingano zabo z’umuryango no muri sosiyete babarizwamo mu gihe bageze mu nzego zo hejuru zifatirwamo ibyemezo.



Aya mahugurwa yasojwe n'umuvugizi w'Ihuriro, Hon. UWANYIRIGIRA Gloriose. Mu ijamba rye, yashimiye abagore bo mu rugaga rushamikiye ku mitwe ya politiki mu ntara y'Iburengerazuba ku bwitabire bagaragaje, ashimira n'umufatanya bikorwa UNDP wateye inkunga amahugurwa. Yavuze ko aya mahugurwa yababereye umwanya wo kongera kurebera hamwe inzitizi zigihari zibuza abagore kujya no kugira uruhare mu nzego zifatirwamo ibyemezo zaba izo mu buyobozi bw'Imitwe ya politiki ndetse n'iz'ubuyobozi bunyuranye bw'Igihugu. Yavuze ko ibiganiro bahawe bigaragaza ko umugore ashoboye bityo abashishikariza gukoresha amahirwe bahabwa n'ubuyobozi bwiza bw'Igihugu bakayabyaza umusaruro bagatera imbere. Yabasabye gusangiza ubumenyi bungutse bagenzi babo, abizeza ko Ihuriro rizakomeza gutegura amahugurwa yo kongerera ubumenyi n'ubushobozi abagore bo mu Mitwe ya Politiki, kugira ngo barusheho kugira uruhare mu miyoborere y'Igihugu.